

# INUIT ATAQATIGIIT

## Inatsisartuni



UKA 2018/23  
10.10.18.  
Múte Bourup Egede

**Uunga siunnersuut: Pisortat oqartussaaffigisaanni suliffeqarfiinilu nioqqutissanik kiffartuussinernillu pisiarnermut tunngatillugu neqerooruteqartitsisarneq pillugu Inatsisartut inatsisaat nr. xx, xx. xxx 2018-imeersoq.**

(Inuussutissarsiornermut Nukissiuuteqarnermullu Naalackersuisoq)

Naalackersuisut Inatsisartut inatsisissaatut siunnersuutaannut qulaani pineqartumut Inuit Ataqatigiit matumuuna imaattumik oqaaseqaateqassaagut.

Pisortat aningaasartuutigisartagaat tassaapput innuttaasut aningaasaataat isumatusaartumik atugassat. Ulluinnarni inuunitsinni aningaasartuutit ilaat pinngitsoorsinnaanngilagut, aningaasartuutilli ilaat ilumut aningaasartuutigisariaqarnerlutigit eqqarsaatersuutigisariaqalerunarpaput. Piffissanngunnginnerpalu pisortat aningaasartuutaasa sukumiisumik innuttaasut sinniisaannit, tassa politikikkut suliaqartunit, nalilersoqqissaarneqarnissaat?

Pisortat taakkulu suliffeqarfiutaasa nioqqutissanik kiffartuussinernillu pisiarnerat nalilersugassatta ilagaat. Inatsisissatullu siunnersuut qulaani pineqartoq iluatsillugu nalilersuisinnaaneq aallarnisarneqarsinnaasoq Inuit Ataqatigiit isumaqarput.

Pisortat suliffeqarfiutaasalu nioqqutissanik kiffartuussinernillu pisiarnissaannut Naalackersuisut inatsisissatut siunnersuutaat tunngaviatigut tapersernartuuvoq, tassami siusinnerusukkut pisortat namminneq kiffartuussisussanut qanoq malitassaqaarnissaa aalajangersaannartarsimagaluarmassuk. Inatsisiliornikkut maanna tunngavissinnaanngussavarput inuussutissarsiortut pisortanut sullisserusuttut qanoq malitassaqaarnerannik siornatigorniit ersarinnerusumik ammanerusumillu sinaakkusiinissaq. Siornatigummi politikerit imaluunniit pisortani suliffeqarfiutaanilu atorfillit iluarisaat aallaavigalugu malittarisassiorsinnaanissaanut

# INUIT ATAQATIGIIT

## Inatsisartuni



periarfissaqarsimanera maanna inatsisissamik siunnersuuteqarnikkut periarfissaanera qimakkiartuaarneqarsinnaangormat alloriarneruvoq pitsaasoq.

Inuit Ataqatigiit Inatsisissatut siunnersuutip suliarinerata nanginnissaanut ilaatigut makku sammeneqarnissaat inassutigaarput:

Pisortat suliffeqarfiutaasalu nioqqutissanik kiffartuussinernillu pisisarnerminni suliffeqarfiit nunatsinneersut salliullugit sullissisorisassagaat piumasaqaataalissasoq. Soorunami akinik unammillersinnaasariaqarput uanilu aatsitassanut inatsimmi §18 isumassarsiorfiusinnaanera innersuupparput. Tassanimi nunatsinni suliffeqarfiit nunani allani suliffeqarfinnut unammillersinnaassuseqarunik salliunneqarnissaat qulakkeerneqarsimammat.

Pisortat nioqqutissanik kiffartuussinernilluunniit pineranni inatsisissap aatsaat nioqqutissat kiffartuussinerillu 500.000 kr. taannaluunniit sinnerlugu aatsaat nalilinnut atuutsinneqarniarnerata nalilersoqqinnissaa.

Inatsisissaq ataatsimiitsitaliami sukumiisumik qulaajarneqassasoq tassanilu tusarniaanermi akissutit aamma sammeneqarluassasut. Ilanngulluguttaaq inuussutissarsiortut susassaqtullu allat aggersarneqarlutik inatsisissap toqqammavigissaartumik peqataatitsilluarfiusumillu naammassineqarnissaa aqqutissiuussinnaaniassagatsigu.

Taamak oqaaseqarluta inatsisissatut siunnersuut ataatsimiitsitaliami susassaqtumik sukumiisumik suliarineqartussanngorlugu innersuupparput.